

# Vun driweriwer

erscheint auf [www.lenauheim.de](http://www.lenauheim.de)

monatliche  
Erscheinung

Juli 2018

von Helen Alba

## Iwers Anrede un Kallich plicke

Schun Wuche vor der Kerwei han alli großi Mädle druf gewart, vun eem Bu angered zu were, for mitnaner um die Kerwei gehn. Großes Mädsl war mer, wann mer die achti Klass abschloss ghat hat. Manchi Mädle ware meh im Geropps un sin schun frieh angered gin, anri erscht später. Wus nit so recht klappe hat wille, han die Eltre nohgholf – so sin die Kerweiphaare zustand kumm.

Wann dann de Bu es Mädsl angered hat ghat, sin Verpflichtunge uf ne zukumm. Bis zur Kerwei hat er bei jedem Sunntachsbaal „uf sei Mädsl owacht gin mise“! Des hat sovill gheescht: uf jede Fall hat er de erschte Tanz mit seim Kerweimädsl tanze mise. Und dernoh hat er de ganze Baalowet ufpasse misse, dass sei Mädsl jo ke Tanz auslosst. Entweder hat er sich mit anre Buwe abgered un sie han ihre Mädle unenaer getauscht. Oder er hat ke anres Mädsl zum Tanz uffordre kenne, bis er nit gsiehn hat, dass sei Mädsl uf der Tanzfläche is. Un desselwi hat ach for die Kerweitäch gegillt.

Die Mutter, Großmutter un Tante, awer ach die Nachberschleit – die immer der Tanzerei mit scharfe Aue zugschaut han – ware stark stalliererisch. Es is jo hie un do vorkumm, dass een oder zwaa Mädle e Tanz ausgelosst han, weil se halt nit zum Tanze ufgfordert gin sin. Un des hat mer „Kallich plicke“ gennennt. Wann e Mädsl Mauerbliemche war, wars tächlang im Gered. Un iwerhaupt, wanns schun for die Kerwei angered war, hat sowas nit passieere derfe oder selle. Doch so war des selmols.

## Im Kichekredenz

Unser Kichekredenz war uralt. Die Farb war trapp. Un er hat zwaa Teeler ghat. Es owerschti hat zwaa Finschtre ghat un drin ware Gläser, Tipple, Schale, Tellre, Suppeschissl. Alles scheen der Greeß noh ufgstellt. Ganz frieher ware ghäkelti Spitzereie an de Stellasche mit Reinsnägl angebrung. Später dann sin die mit blumiche farwiche Papierstreife ersetzt gin. Die hat mer halt nit wäsche misse, sie sin noh gewisser Zeit eenfach ersetzt gin. Im unerschte Kredenzteel ware die Phanne, Tippe un Blecher. Zwischer de zwaa Teeler war e Leerraum, dorte han Mertl, Kaffeemiehl, Salzdesl ihre Platz ghat. Mir han in friehriche Johre ach e scheenes Lied iwer e Kaffeetippl gsung:

Auf der Großmutter ihm Kaffeehäferl steht: ich bleib dir auf ewig treu. Und nun weiß ich, das war vom Großvater halt auch nur so a Rederei, denn mein Schatz hat den selben Satz zu mir g'sagt und ist mir untreu worn. Treu blieb er mir en Schmarrn. Und der Lugendippel, dieser Lausezipfel hat e andre, und was hab i? Habe zum Angedenken an der Wand hängen nur sei blödsinnig Fotografie. Und nun reib i mir die Augen aus und i pfeif auf an Bräutigam und der Großmutter ihr Kaffeehäferl hau i zamm.